



13 November 2017
13 November 2017
P.U. (A) 343

WARTA KERAJAAN PERSEKUTUAN

*FEDERAL GOVERNMENT
GAZETTE*

KAEDAH-KAEDAH SURUHANJAYA PERKHIDMATAN
AWAM 2017

PUBLIC SERVICES COMMISSION RULES 2017

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

PERLEMBAGAAN PERSEKUTUAN
KAEDAH-KAEDAH SURUHANJAYA PERKHIDMATAN AWAM 2017

SUSUNAN KAEDAH-KAEDAH

Kaedah

1. Nama
2. Tafsiran
3. Mesyuarat Suruhanjaya
4. Mesyuarat khas Suruhanjaya
5. Pengerusi mesyuarat Suruhanjaya
6. Mengundang orang lain untuk menghadiri mesyuarat Suruhanjaya
7. Penzahiran kepentingan
8. Kelakuan semasa mesyuarat
9. Setiausaha mesyuarat Suruhanjaya
10. Agenda mesyuarat Suruhanjaya
11. Kertas untuk dibentangkan dan minit mesyuarat
12. Pengundian
13. Keputusan
14. Keputusan tanpa mesyuarat
15. Penyampaian notis, dsb.
16. Jawatankuasa
17. Kerahsiaan
18. Tatacara
19. Pindaan
20. Pembatalan

PERLEMBAGAAN PERSEKUTUAN

KAEDAH-KAEDAH SURUHANJAYA PERKHIDMATAN AWAM 2017

PADA menjalankan kuasa yang diberikan oleh Fasal (8) Perkara 144 Perlembagaan Persekutuan, Suruhanjaya Perkhidmatan Awam membuat kaedah-kaedah yang berikut:

Nama

1. Kaedah-kaedah ini bolehlah dinamakan **Kaedah-Kaedah Suruhanjaya Perkhidmatan Awam 2017.**

Tafsiran

2. Dalam Kaedah-Kaedah ini, melainkan jika konteksnya menghendaki makna yang lain —

“anggota” ertinya seseorang anggota Suruhanjaya dan termasuklah Pengerusi dan Timbalan Pengerusi Suruhanjaya;

“mesyuarat Suruhanjaya” ertinya suatu mesyuarat Suruhanjaya yang diadakan mengikut kaedah 3;

“Pengerusi” ertinya Pengerusi Suruhanjaya atau mana-mana anggota yang menunaikan fungsi Pengerusi menurut Fasal (3A) Perkara 142 Perlembagaan Persekutuan;

“Setiausaha” ertinya Setiausaha Suruhanjaya dan termasuklah Timbalan Setiausaha Suruhanjaya;

“Suruhanjaya” ertinya Suruhanjaya Perkhidmatan Awam.

Mesyuarat Suruhanjaya

3. (1) Suruhanjaya hendaklah mengadakan satu mesyuarat Suruhanjaya tiap-tiap minggu, melainkan jika diputuskan selainnya oleh Pengerusi, pada hari dan masa dan tempat yang akan ditetapkan oleh Pengerusi.

(2) Mesyuarat Suruhanjaya hendaklah dihadiri oleh semua anggota.

(3) Tiap-tiap anggota hendaklah diberitahu secara bertulis tentang hari, masa dan tempat mesyuarat Suruhanjaya sekurang-kurangnya sehari sebelum mesyuarat itu.

(4) Pada mana-mana mesyuarat Suruhanjaya, Pengerusi dan empat anggota lain hendaklah membentuk suatu kuorum.

Mesyuarat khas Suruhanjaya

4. Pengerusi boleh, pada bila-bila masa, mengadakan suatu mesyuarat khas Suruhanjaya untuk membincangkan secara terperinci atau memutuskan tentang apa-apa perkara yang berhubungan dengan fungsi Suruhanjaya sebagaimana yang ditetapkan dalam Perkara 144 Perlembagaan Persekutuan.

Pengerusi mesyuarat Suruhanjaya

5. (1) Pengerusi hendaklah mempengerusikan semua mesyuarat Suruhanjaya.

(2) Jika Pengerusi tidak dapat hadir atas apa-apa sebab, mesyuarat Suruhanjaya hendaklah dipengerusikan oleh Timbalan Pengerusi Suruhanjaya.

(3) Jika Pengerusi atau Timbalan Pengerusi Suruhanjaya tidak dapat mempengerusikan mana-mana mesyuarat Suruhanjaya, mesyuarat itu hendaklah dipengerusikan oleh anggota yang dilantik di bawah Fasal (3A) Perkara 142 Perlembagaan Persekutuan.

Mengundang orang lain untuk menghadiri mesyuarat Suruhanjaya

6. (1) Suruhanjaya atau Pengerusi boleh mengundang mana-mana orang untuk menghadiri mana-mana mesyuarat Suruhanjaya bagi maksud menasihati Suruhanjaya

tentang apa-apa perkara yang sedang dibincangkan tetapi tidak berhak untuk mengundi pada mesyuarat tersebut.

(2) Tiada keputusan boleh dibuat oleh Suruhanjaya dalam mana-mana mesyuarat Suruhanjaya melainkan orang lain yang diundang telah meninggalkan mesyuarat itu.

Penzahiran kepentingan

7. (1) Mana-mana anggota yang mempunyai apa-apa kepentingan dalam apa-apa perkara yang sedang dipertimbangkan atau diputuskan dalam mana-mana mesyuarat Suruhanjaya hendaklah menzahirkan hakikat dan jenis kepentingannya dan yang hendaklah direkodkan dalam minit mesyuarat yang dalamnya penzahiran itu dibuat.

(2) Selepas penzahiran di bawah subkaedah (1) dibuat, anggota itu tidak boleh hadir atau mengambil bahagian dalam mana-mana pertimbangtelitian atau keputusan mesyuarat Suruhanjaya yang berhubungan dengan perkara itu dan ketidakhadiran itu hendaklah direkodkan dalam minit mesyuarat yang dalamnya penzahiran itu dibuat.

Kelakuan semasa mesyuarat

8. (1) Dalam mana-mana mesyuarat Suruhanjaya, Pengerusi boleh menegur mana-mana anggota jika Pengerusi mendapati anggota itu menyimpang daripada hal yang sedang dibincangkan atau selainnya berkelakuan dengan cara yang difikirkan tidak mengikut tatacara oleh Pengerusi.

(2) Pengerusi boleh mengarahkan mana-mana anggota yang ingkar kepada teguran yang dibuat di bawah subkaedah (1) untuk meninggalkan mesyuarat Suruhanjaya.

(3) Walau apa pun subkaedah (2), Pengerusi boleh membenarkan anggota itu untuk menghadiri semula mesyuarat Suruhanjaya.

(4) Keputusan Pengerusi adalah muktamad.